

durch ihnen das Wasser wider aufstiehet/ daß sie im Speißfang ertschnap-
pen vnd einsauffen.

Wie man die Viber fange vnd jage/ warzu er in der Arzney/ sonder-
lich sein Geyle Castoreum genant/ gut vnd dienlich/ besitze den ob-
gemelten Plin. secund. Gesn. vnnnd andere. An dem schwarzen Meer/
in den Seen des Morenlands/ in der Thonaw vnd Rhein/ werden sie
gefangen/ sonderlich aber/ in den münächtigen Länderen/ da der Fisch-
Wasserer ohne zahl/ sagt Olaus. Gesn. ob wohl diß in allen Länden/
ein gemein Thier/ so seynd sie doch zum liebsten/ wo grosse Wasserflüß
rinnen/ die Aaren/ Reuß/ Limmat im Schweyzerland/ auch die
Birß vmb Basel hat dero vil/ Hispanien fast bey allen Wasserren;
Strab. sagt/ in Italien da der Paw ins Meer laufft/ an der Marne in
Frankreich/ in Prüssen/ Reußen/ Moscowiten/ Samogithia, an
der Thonaw/ Rhein/ Nacker/ 2c. werd er gefunden.

Wer aber/ von überflüssigen Viber vnd Otterfang wüssen wil/ der
lese die Historiam von Canada oder Noua Francia, dahin die Frans-
osen 1606. Colonias, als Port Royal vnnnd Kebec gebawen/ wie zu
finden bey dem Merceur François tom. 1. fol. 296. vnnnd tom. 5. fol.
223. da wirdt dem Leser/ ein Benügen beschehen.

Das neunzehende Capitel.

Von den Muschelen.

Muschulus aquæ dulcis, kleine Riech-Muschelen/ so in süßem
Wasserren gefunden werden.

Vil mehr seltsammer vnd wunderbarlicher Muschelen/ werden in
Meer geboren/ dann in süßem Wasserren/ vrsach ist die Art vnd Natur
der gesalzenen Wasserren. Nichts destominder/ so werden auch in süßem
Wasserren/ als in Pfäzen vnd Weyeren/ solche kleine Muschelen ge-
sehen/ haben zwo Schalen ganz dün vnnnd zart/ aussen schwarzlecht/
gleich als von vil Schiferen oder Stücken zusamen gesetzt/ rauchlecht/
seynd innerhalb glatt/ schwarzblaw/ sie haben ein hart Fleisch/ mit
grosser Arbeit zuverdüwen/ eines argen Geschaffts/ auß welcher Vrsach/
die so sollicher zu vil essen/ in kalte Fieber fallen/ sagt Gein.